

2017 Schnitzelpunk

Kürzlich in dr Sauna händ miar philosophiert,
warum bald jeda Lümmel sina Pimmel kahl rasiert.
Miar händs glaub usagfunda, dia Antwort isch schnäll gä:
Dia Typa händ nid gärn, wenn Fraua Hoor händ uf da Zäh.

Z Bern im Bundeshus, noch dr Rotsversammlung,
isch dr frommi Darbellay uf eimol zimmlig rammlig.
Aimol isch kaimol, tänggt är, jetz gönni miar an Figg,
aifach ohni Gummi drum, bin schliesslich Katholik.

Jedi Region hät ihri Gaiss, üssri heisst Martulla.
Miar redend impfall vor Coop-Reklama, nid vo dära Schrulla.
Dia mäckeret zwor au, nid nur ab und zua.
Doch vom Blocher-Muni-Stall isch sie glaub meh a Kua.

Hetsch gärn ..ähm.. öppis z'säga, wetsch ..ähm.. ind Politik.
Git's ..ähm.. an altbewärta ..ähm.. ganz eifacha Trick.
Saisch möglichscht ..ähm.. nüt und ..ähm.. jo ganz viel „Ähm“,
dänn ghörsch ..ähm.. schnäll au du zur..ähm.. Grähm dö la Grähm.

Dä isch doch nid ganz putzt, dr Bischof Haas z Vaduz.
Är baut a Gruft für sini Knöcha für hundert-tuusig Stutz.
Das Grab söll nu vom Feinschta si, mit allem drum und dra,
mit Hinteriigang, dass ma au vo hinna ina kaa.

Was d Menschheit hüt alls kann und weiss, das isch extrem.
Miar händ a Lösig für fasch jedes technischa Problem.
Au z Östrich händs es gschaft, händ gforscht uf Tod und Läba.
Drum wüssends jetzt au, wia ma kann as Stimmcouvert zuakläba.

Verhülle vo da Fraua, mit Schleier oder Burka,
das machend d' Muselmänner us Angscht vor fremda Gurka.
Miar Bündner händ au üssers Rezäpt für Antiboock:
Miar steckend üsi Fraua aifach in a Trachtarock.

Dass Kunschthuus ufem Kunschthuus stoht, isch eigentlich scho rächt.
D Verwächslig mitma Kachelofa wär jo wüerkli schlächt.
Doch dia wo mianggend wäg dr Sproch, das sind doch armi Tschütsch.
Ma gseht's jo kuum, kas fasch nid läsa, nid amol uf Tütsch

Miar würend niamols säga, Romanisch sei a Schmarra.
Für üssari Kultur ischs a wichtigs Rad am Karra.
Ma wüssti ohni nid wohi mit allna däna Priisa,
wo nu aswär kann kriaga, wo romanisch stinkt bim Schiissa.

Miar Schnitzelpunks sind offa, gradusa und direkt,
aber miar sind offabar politisch nid korrekt.
Zum niamert despektiara in üser Multi-Sproch-Naziun,
heissend miar ab jetzt: Ils Punks da Schnitz Grischun

Sie händ dr Marti blitzt zwüsched Zizers und Khur Nord.
Z Masans bim Kreisel träiter, fahrt uf Zizers zrugg sofort.
Vo döt us wieder zrugg uf Khur, är weiss halt wiamas macht.
Will dasmol passter uf, dass är au schön ind Kamera lacht

„Guatmensch“ isch as Schimpfwort. Guat isch nümma guat.
Zum guat si, statt as Arschloch, bruchts hüt a bizli Muat.
Dr Tom findt das drnäba, är wehrt sich zimli barsch.
Schliesslich heisst är Leibundgut und nid Leibundarsch

Wenn an Falter z Rio flatteret, dänn stürmts in Tennessee.
Jeda kennt dia Thesa us dr Chaos-Theorie.
Doch gits au no Varreckters, as bsunders Axiom:
Wenn z Churwalda schiissisch, gits im Meiersboda Strom

Är isch a sona gaila Siach, schlicht unübertroffa.
Ma sait, bevor är uuftaucht sei, seg niana öppis gloffa.
Au wenn är d'Wält müasst retta, tät är das eins, zwei, drei.
Ma müasst na nur liab frogä, sait dr Fifi Frei.